

四庫全書

集部

欽定四庫全書

集部

御選唐宋詩醇卷四十六

詳校官侍講_臣王燕緒

主事銜_臣徐以坤覆勘

總校官降調編修_臣倉聖脉

校對官編修_臣吳舒帷

謄錄監生_臣薩龍光

欽定四庫全書

御選唐宋詩醇卷四十六

山陰陸游詩五

目錄

東村散步有懷張漢州

將軍行

古別離

望夫石

古別離

偶懷小益南鄭之間悵然有賦

欲出遇雨

看鏡

夜分不寐起坐園中至旦

步至湖上寓小舟還舍

筓篴謠寄季長少卿

悶極有作

三峽歌

贈道流

艾如張

郊行夜歸書觸目

歲暮感懷

山園雜詠

雨夜書感

春晚雜興

夜歸

三月十一日郊行

路傍曲

秋夜

舍北晚眺

初冬感懷

聞雁

枕上偶成

舍北閒望作六字絕句

雨夜有懷張季長少卿

客言來自上臯道中以其語作一絕

殘臘

懷舊

幽居初夏

晨起

六月二十四日夜分夢范至能李知幾尤延之同

集江亭諸公請予賦詩記江湖之樂詩成而覺忘
數字而已

題韓運鹽竹隱堂絕句

舟中詠落景餘清暉輕橈弄溪渚之句蓋孟浩然
耶溪泛舟詩也因以其句為韻賦詩

秋夜紀懷

舍北搖落景物殊佳偶作

夜坐

隴頭水

書志

書憤

小舟遊西涇度西岡而歸

春行

閒身

舍北行飯書觸目

雪夜感舊

雜感

蘭

感舊

露坐

新秋

秋夕露坐作

感秋

新涼

豐歲

小舟過古澤效王右丞

秋晴見天際飛鴻有感

戊午重九

舟中

冬日感興十韻

菴中晨起書觸目

春日小園雜賦

沈園

讀晉書

春晴自雲門歸三山

夜聞姑惡

讀前輩詩文有感

讀隱逸傳

秋陰

秋懷

秋思

冬晴與子坦子聿遊湖上

齋中弄筆偶書示子聿

夢中作遊山絕句

北望感懷

人日東園

枕上作

長干行

小橋

觀畫山水

示友

十月

梅花

對酒戲詠

先少師宣和初有贈晁公以道詩云奴受才如蕭
穎士婢知詩似鄭康成晁公大愛賞今逸全篇偶

讀晁公文集泣而足之

追感往事

欽定四庫全書

御選唐宋詩醇卷四十六

山陰陸游詩五

散步有懷張漢州

扶杖村東路秋來始此回
寒鴉盤陣起野菊卧枝開
憂國丹心折懷人雪鬢催
房湖八千里那得尺書來

將軍行

將軍入奏平燕策持笏榻前親
指畫天山熱海在目中

下殿即日名烜赫馳出都門雪初霽直過黃河水未圻
繡旗方掠桑乾渡羽檄已入金臺陌勇士如鷹健欲飛
孱王似兔何勞搦戎服押俘獻廟社正衙第賞頒詔冊
端門賜酺天下慶御觴尚恨滄溟迮從來文吏喜相輕
聊遣濡毫書竹帛

古別離

孤城窮巷秋寂寂美人停梭夜歎息空園露濕荊棘枝
荒蹊月照狐狸迹憶君去時兒在腹走如黃犢爺未識

紫姑吉語元無據
况憑瓦兆占歸日
嫁來不省出門前
魂夢何因識酒泉
粉絲磨鏡不忍照
女子盛時無十年
詞意俱老絕去摸
擬之迹而與古為
化

望夫石

送君遠戍出河北
男兒自以身許國
不能彎弓騎惡馬
欲隨君去何由得
登山橋首西北雲
形容雖變心猶存
月明夜夜照淚痕
鐵心石腸輸與君
不煩刻劃而意已
獨至

古別離

君北遊司并我南適熊湘邂逅淮陰市共飲官道傍
丈夫各有懷窮達詎可量臨別一取醉浩歌神激揚勲業
有際會風雲正蒼茫亂點劒鋒血苦寒芒屢霜死即萬
鬼鄰生當致虞唐丹雞不須盟我非兒女腸
構思深出語警不獨摩浣花之壘亦兼入青蓮之室

偶懷小益南鄭之間悵然有賦

西戍梁州鬢未絲嶠山漾水幾題詩劒分蒼石高皇迹

原註 嶠家廟傍有高巖擁朱門老子祠
原註三泉道上
有老君洞景趣

皇試劒石中分如截

幽遂燒兔驛亭微雪夜騎驢棧路早梅時登臨不用頻悽

斷未死安知無後期

欲出遇雨

東風吹雨惱遊人滿路新泥換細塵花睡柳眠春自嬾
誰知我更嬾於春

我更嬾於春五字新鮮

看鏡

凋盡朱顏白盡頭神仙富貴兩悠悠胡塵遮斷陽關路
空聽琵琶奏石州

七十衰翁卧故山鏡中無復舊朱顏一聯輕甲流塵積

不為君王戍玉關

原註馬正惠公喜功名每曰辛未甚衰若有邊警願預征行得良馬數疋

輕甲一聯足矣

盧世淮曰少陵勲業頻看鏡彼簡而饒此盡而暢

夜分不寐起坐園中至旦

涼氣蘇衰疾幽情入杖藜月驚孤鵲起天帶衆星西松

菊今彭澤山川古會稽清吟殊未愜喔喔已晨雞

領聯對句似奇語道出正可一粲等閒言語變瑰奇殆謂是耶

步至湖上寓小舟還舍

病墮支離境閒尋漫浪遊湖平天鏡曉山峭石帆秋賒酒家家許看花處處留歸途倦扶杖却上釣魚舟

筓篴遙寄李長少卿

庭樹非不榮霜實萬葉枯朋友豈我棄漸遠勢自踈中

夜起太息發篋覓舊書塵昏蠹食損行缺字欲無一讀
色已變再讀涕淚濡卷書置篋中寧使飽蠹魚

悶極有作

貴已不如賤狂應又勝癡新寒壓酒夜微雨種花時堂
下藤成架門邊枳作籬老人無日課有興即題詩

三峽歌

乾道庚寅予始入蜀上下三峽屢矣後二十五年歸
畊山陰偶讀梁簡文巴東三峽歌感之偶作

十二巫山見九峰
船頭彩翠滿秋空
朝雲暮雨渾虛語
一夜猿啼明月中

我遊南賓春暮時
蜀船曾繫掛猿枝
雲迷江岸屈原塔
花落空山夏禹祠

取境清絕一洗陽臺慣語
為巫山生色

贈道流

憶在長安爛漫遊
大明宮闕與雲浮
今朝偶上慈恩塔
北望芒芒禾黍秋

原註唐含元殿與慈恩塔南北相直

贈道流而及此蓋自性情流出者

三五元元復騰騰服氣燒丹總不能借問生涯在何許
孤舟風雨伴漁燈

艾如張

錦膺繡羽名山雞清泉可飲林可栖稻梁滿野棄不啄
雖有奇禍無階梯東村西村煙雨晚蕭艾離離林薄淺
翩然一下駭機發汝雖知悔安能免漢家天子南山下
萬騎合圍窮日夜犬牙膺爪死不辭觸機折頸吁可悲

寓意深至意凡三折李賀作不能及也

郊行夜歸書觸目

老翁病起厭端居隨意東西不問途
霜野草枯鷹欲下江天雲濕雁相呼
空垣破竈逃租屋青帽紅燈賣酒壚
未畏還家踏泥潦園丁持炬小兒扶

歲暮感懷

我家釋耒起遠自東封前詩書守素業
蟬聯二百年長老日零落念之心惕然
每恐後生輩或為利欲遷我少

亦知學蹭蹬及華顛訟過豈不力壽非金石堅

我壯已早衰晨鏡每惆悵藥物姑自持耆老曷敢望造物有乘除貧悴博無恙歸鄉更多感朋舊盡凋喪客來多避席謂我丈人行此意詎敢忘報子以直諒

士生始志學固為聖人徒人人可稷禹世世皆唐虞仰事與俯育治道無絕殊孔孟之所傳世俗顧謂迂申韓尚刻薄老莊競虛無爾車非不良盍行九軌途

在昔祖宗時風俗極粹美人才兼南北議論忘彼此誰

令各植黨更仆而迭起中更夷狄禍此中猶未已臣不
難負君生者固賣死儻築太平基請自厚俗始

學有根柢故體製肅括意指宏深大家風力非徒事吟
咏者流也

文集論選用西北士大夫劄子天聖以前多取北
人南方士大夫沈抑者多仁宗照知其弊公聽並
觀兼收博采無南北之異及紹聖崇寧間取南方人
更多而北方士大夫復有沈抑之歎陳瓘獨見其弊

昌言於朝曰重南輕北分裂有萌嗚呼瓘之言天下之至言也

山園雜詠

殘春終日在林亭散髮披衣醉復醒科斗已成鼃閣閣櫻桃初結子青青魚遊滄海寧濡沫禽慕雕籠即翦翎薄晚東風吹小雨笑携長鏡伴畦丁

意雖刻露語自新穎

雨夜書感

宦遊四十年歸逐桑榆暖皇恩念黎老一官猶置散春
殘桃李盡風雨閉空館有懷無與陳萬事付酒碗近代
固多賢吾意終不滿可憐杜拾遺冒死明房琯慷慨詎非
奇經綸恨才短羣胡穴中原令人歎微管

以古喻今當為張浚而發本傳云言者論游力說張浚
用兵免歸則浚之罷游未必不為之言故以甫之救琯
自比浚之與琯僨事如一富平再敗與陳陶青坂何以
異詩深歎其才短固不誣也

春晚雜興

池面萍初紫，牆頭杏已青。
携兒撐小艇，留客坐孤亭。
相法無侯骨，生年直酒星。
正須遺萬事，莫遣片時醒。

方回曰：留客坐孤亭，雖非奇句，却極有味。五六亦新異。

夜歸

踈鐘渡水來，素月依林上。
煙火認茅廬，故倚船篷望。

妙語似王融江皋曲。

三月十一日郊行

到處人家可乞漿
槐陰巷陌午風涼
水陂漫漫新秧綠
山壠離離大麥黃
父子力耕春漸老
婦姑共績夜猶長
堯民擊壤雖難繼
片美懷君未敢忘

路傍曲

淒涼路傍曲
朱門人不知
秋街槐葉落
正是斷腸時

秋夜

燈欲殘時酒半消
斷碁踈雨共無憐
老來萬事渾非昔

惟有詩情似灞橋

舍北晚眺

紅樹青林帶暮煙並橋常有賣漁船樊川詩句營丘畫
盡在先生拄杖邊

自然入畫

初冬感懷

落葉埽還積斷鴻飛更鳴羸軀得霜健老眼向書明水
瘦河聲壯莢枯馬力生竟為農父死白首負功名

聞雁

霜高木葉空月落天宇黑
哀哀斷行雁來自關塞北
江湖稻粱少念汝安得食
蘆深洲渚冷歲晚霰雪逼
不知重雲外何處避畢弋
我窮思遠征羨汝有羽翼

意入風騷格逼漢魏與杜陵
相當真乃不復多讓

枕上偶成

放臣不復望修門身寄江頭黃葉村
酒渴喜聞疎雨滴夢回愁對一燈昏
河潼形勝寧終棄周漢規模要細論

自恨不如雲際雁南來猶得過中原

舍北閒望作六字絕句

潘岳一篇秋興李成八幅寒林舍北偶然倚杖盡見古

人用心

善畫似真以對面取之用意微妙

雨夜有懷張季長少卿

放翁雖老未忘情獨卧山村每自驚鼎鼎百年如電速
寥寥一笑抵河清梅初破藟行江路燈欲成花聽雨聲

正用此時思劇飲故交零落愴餘生

潘問奇曰河清如此用形容殊苦

客言來自上臯道中以其語作一絕

日曬霜融作淺泥酒家却在斷橋西
五陵今代無豪傑獨卧茅簷聽午雞

殘臘

殘臘無多日吾生又一年
林塘明夕照墟塔淡春煙
山色危欄角梅花綠酒邊
歲時元自好老病獨悽然

懷舊

翠崖紅棧鬱參差小益初程景最奇誰向毫端收拾得
李將軍畫少陵詩

張完臣曰又是一蜀道佳話

幽居初夏

湖山勝處放翁家槐柳陰中野徑斜水滿有時觀下鷺
草深無處不鳴蛙籜龍已過頭番筍木筆猶開第一花
歎息老來交舊盡睡餘誰共午甌茶

寫得幽字意出

潘問奇曰頸聯對句更勝

晨起

齒豁不可補髮脫無由栽
清晨明鏡中老色蒼然來
餘年亦自惜未忍付酒杯
抽架取我書危坐闔復開
萬世見唐堯夔龍獲親陪
寥寥三千年氣象挽可回
豈以七尺軀顧受世俗衰
道在無不可廊廟均蒿萊
約旨植義真力彌滿清
晨十字亦有蒼然之氣

六月二十四日夜分夢范至能李知幾尤延之同
集江亭諸公請予賦詩記江湖之樂詩成而覺忘
數字而已

露箬霜筠織短篷飄然來往淡煙中偶經菱市尋谿友
却揀蘋汀下釣筒白菡萏香初過雨紅蜻蜓弱不禁風
吳中近事君知否團扇家家畫放翁

風流自賞夢中亦應得意五六調新采麗淺薄者議其
未穩真可一噓

題韓運鹽竹隱堂絕句

塵埃車馬日駸駸誰解從君一散襟待我清秋有閒日
抱琴來寫萬龍吟

舟中詠落景餘清暉輕橈弄溪渚之句蓋孟浩然
耶溪泛舟詩也因以其句為韻賦詩

獨鶴還故鄉歸然但城郭出門無與遊所至苦寂寞
飯事幽討此計殊不惡薄暮宿漁家蒼煙帶墟落

維舟入谷口信步造異境隔離雞犬聲滿地梧楸影瓦

甌炊香稻石泉汲新井人間苦偏反愛此須臾景

老圃髮如霜見客能廢鋤與坐使之年自云八十餘老
身六朝民草舍數世居力守遠祖言一字不學書

沿溪得茅店酒旗出柴荆杖頭錢已空一醉何由成主
人語鄭重手把甕面清勸我姑小留溪魚亦可烹

秦皇酒甕邊古有釣魚磯我來必竟日時挈雙鯉歸白
鷺真可人常先孤棹飛高詠江練句令人憶元暉

鏡湖三百里風止鏡面平持以照吾心俗塵安得生散

髮鷗鷺間萬事秋毫輕誰能拂東絹寫我孤舟橫
朝發雲根寺暮宿煙際橋冷螢濕不飛潛魚驚自跳菱
船歌裊裊秋浦風蕭蕭平明宿鳥起我亦理歸橈

古寺照滄波老木閤雲洞輕舟不搖櫂正用一風送汲
井漱甘液掃榻寓幽夢所恨山未深城笳聽三弄

禹穴探斷簡樵風泛清溪倒影森松桂避船散鳬鷺座
中有異境十里青玻瓈高塔忽招人湖邊日未低

溪行已清秋還舍尚殘暑天公為解圍簾櫳過疎雨青

疏喜小摘紅粒亦新杵一飽坐北軒蘋花泣煙渚

作者詩以萬計閒適之什往往出之率易亦復數見不
鮮沙中金屑每苦難披十詩直舉胷情清真古澹妙處
在神味之間不可以貌求之

秋夜紀懷

北斗垂莽蒼明河浮太清風林一葉下露草百蟲鳴病
入新涼減詩從半睡成還思散關路炬火驛前迎

方回曰中四句語意至工

舍北搖落景物殊佳偶作

屋角成金字溪流作穀紋斜通小橋路半掩夕陽門孤
艇衝煙過踈鐘隔塢聞杜門非獨病實自厭紛紛

方回曰放翁此題凡五首所謂筆端有口新冬景物
搜抉無遺屋角成金字本出北史斛律金傳以對溪
流作穀紋亦奇

夜坐

杳杳霜鐘十里聲娟娟江月半窗明陳編欲絕猶堪讀

微火相依更有情九曲煙雲新散吏

原註時方被命
再領武夷祠祿百

年鉛槧老諸生頽然待旦君無笑尚勝聞雞賦早行

原註

溫岐詩云雞聲茅店月人迹
板橋霜蓋唐人早行絕唱也

隴頭水

隴頭十月天雨霜壯士夜挽綠沉槍卧聞隴水思故鄉
三更起坐淚數行我語壯士勉自彊男兒墮地志四方
裹尸馬革固其常豈若婦女不下堂生逢和親最可傷
歲輦金絮輸胡羗夜視太白收光芒報國欲死無戰場

有古直悲涼之氣

書志

往年出都門誓墓志已決況今蒲柳姿俛仰及大耋妻
孥厭寒餓鄰里笑迂拙悲歌行拾穗幽憤卧齧雪千歲
埋松根陰風蕩空穴肝心獨不化凝結變金鐵鑄為上
方劍鑿以佞臣血匣藏武庫中出參髦頭列三尺彗星
辰萬里靜妖孽君看此神奇醜虜何足滅

幻想奇文不可磨滅

書憤

白髮蕭蕭卧澤中，祇憑天地鑒孤忠。
阮窮蘇武餐羶久，憂憤張巡嚼齒空。
細雨春蕪上林苑，頽垣夜月洛陽宮。
壯心未與年俱老，死去猶能作鬼雄。

方回曰：悲壯感慨，不當徒以虛語視之。

鏡裏流年兩鬢殘，寸心自許尚如丹。
衰遲罷試戎衣窄，悲憤猶爭寶劍寒。
遠戍十年臨的博，壯圖萬里戰皋蘭。
關河自古無窮事，誰料如今袖手看。

小舟遊西涇度西岡而歸

小雨重三後餘寒百五前聊乘瓜蔓水閒泛木蘭船雪
暗梨千樹煙迷柳一川西岡夕陽路不到又經年
穩中帶秀此境正不易到

王復禮曰較太白梨花千樹雪楊柳萬條煙似勝一
籌但水衡記以五月為瓜蔓水此屬一時誤用

春行

九日春陰一日晴強扶衰病此閒行猩紅帶露海棠濕

鴨綠平隄湖水明

原註杜子美晚看紅濕處花重錦官城李太白蜀日紅且明用濕字明字

可謂奪造化之功

世未有拈出者

酒賤柳陰逢醉卧土肥稻壟看深耕

山翁莫道渾無用解與明時說太平

方回曰引少陵太白謂奪造化之功却是世未有拈出者前輩用功如此

閒身

炊煙漠漠閉柴荆聊用閒身答太平重碧飛觴心未老
硬黃臨帖眼猶明吳蠶滿箔含桃熟龍麥登車搏黍鳴

補剿息心今有地問君何處用虛名

舍北行飯書觸目

落雁昏鴉集遠洲青林紅樹擁平疇意行舍北三叉路
閒看橋西一片秋小婦破煙撐去艇了童橫笛喚歸牛
形容野景無餘思自怪癡頑不解愁

盧世淮曰先寫景而後入事句句宛肖

雪夜感舊

江月亭前樺燭香龍門閣上默聲長亂山古驛經三折

小市孤城宿兩當晚歲猶思事鞍馬當時那信老耕桑
綠沉金鎖俱塵委雪灑寒燈淚數行

調極清和韻聯斷句工緻可愛

吳喬曰放翁壯時有志經世故有晚歲猶思事鞍馬
當時那信老耕桑之句

雜感

志士山棲恨不深人知己是負初心不須先說嚴光輩
直自巢由錯到今

故舊書來訪死生時聞剥啄叩柴荆自嗟不及東家老
至死無人識姓名

蘭

南巖路最近飯已時散策香來知有蘭遽求乃弗獲生
世本幽谷豈願為世娛無心託階庭當門任君鋤
為幽人寫照寓意深遠作者別調

感舊

夜涉南沮水朝過小益城梯山天一握度棧土微平雨

欽定四庫全書

選唐宋詩
卷四十六

十九

近秦雲暗霜高隴月明至今孤夢裏喝馬有遺聲

原註
蜀馬

皆七字韻語聞
之悲愴動人

凜凜隆中相臨戎遂不還塵埃出師表草棘定軍山壯
氣河潼外雄名管樂間登堂拜遺像千載媿吾顏

我思杜陵叟處處有遺踪錦里瞻祠柏綿州弔海棕蹉
跎悲樞驥感會失雲龍生世後斯士吾將安所從

游人居蜀地於孔明子美企想獨深二詩渾成老健蓋
程形賦音與其人相稱也

露坐

原註立秋
前五日

旋削甘瓜進酒卮
斷雲漠漠斗離離
北臨積水風來壯
東恨長林月上遲
秋近不堪聞急杵
夜涼已復怯輕絺
天孫老抱河梁恨
豈獨人生事可悲

新秋

殘暑無多日幽居近小江
酒醒中夜起松月入山窗
秋風昨夜來聲滿梧桐樹
故人渺天末此夕誰與度
妙語得自直尋亦清晨登隴
首明月照積雪之比

秋夕露坐作

銀河半落露華清
斗南闌干斗北明
冉冉方悲老將至
纖纖又歎月初生
酒牀細滴香浮瓮
衣杵相聞聲滿城
萬卷讀書無用處
却將耕稼報昇平

感秋

秋色關河外
秋聲天地間
壯士感此時
朝鏡凋朱顏
一身寄空谷
萬里夢天山
噫嗚怒皆裂
憤激悲涕潛
古來真龍駒
未必置天閑
長松倒澗壑
委棄同蓁菅
得志未

可測談笑濟時艱凜然出師表一字不可刪

新涼

菰首初離水薑芽淺漬糟粳香等炊玉韭美勝炮羔露
下殘蕪濕風生萬木號從今更何事痛飲讀離騷

豐歲

豐歲歡聲動四鄰深秋景氣粲如春羊腔酒擔爭迎婦
鼉鼓龍船共賽神處處喜晴過甲子家家築屋趁庚申
老翁欲伴鄉閭醉先辦長衫紫領巾

點綴斌媚煞有風致

小舟過吉澤效王右丞

澤國霜露晚孤村煙火微
本去官道遠自然人迹稀
木落山盡出鐘鳴僧獨歸
漁家閒似我未夕閉柴扉
不必似王自饒清致

文集跋王右丞集余年十七八時讀摩詰詩最熟今
永晝再取讀之如見舊師友恨間濶之久也

秋晴見天際飛鴻有感

新晴天宇色正青羣鴻高賽在冥冥兒童相呼共仰視
我亦扶杖來中庭豐年到處稻梁滿胡不暫下栖沙汀
應須江海寄曠快肯為霜雪嗟飄零書生可笑不自喜
憔悴久翦籠中翎鷗波萬里每媿杜鶴化千載知非丁
風前哀號漫激烈月下孤影常玲竚詩成欲寫復懶去
誦似溪友聲泠泠

遣調流麗曲盡心手之妙

戊午重九

朋舊相望天一涯登高結伴只鄰家秋風自欲吹紗帽
衰髻何曾泥菊花藥市神仙思益部饒盤節物記京華
自憐病後歡悰薄小醉歸來日未斜

舟中

拖邊潮水落還生篷底寒燈滅復明約束長年牢繫纜
報人風雨有鼉鳴

不必有寄即事自佳

蕭蕭風雨小江秋不是愁人亦合愁忽聽疎鐘知寺近

笑尋沙路上牛頭

冬日感興十韻

霧雨天昏曠陂湖地阻深蔽空鴉作陣暗路棘成林有
客風埃裏頻年老病侵夢魂來二豎相法欠三壬舊憤
開孤劍新愁感斷砧唐衢惟痛哭莊舄正悲吟瘦跨秋
門馬寒生夜店衾但思全舊壁敢冀訪遺簪樓上蒼茫
眼燈前破碎心長謠傾濁酒慷慨壓層陰

菴中晨起書觸目

暉暉初日上簾鉤
漠漠清寒透衲裘
雪棘並棲雙鵲暝
金環斜絆一猿愁
廉宣卧壑松楠老
王子穿林水石幽
戲事自憐除未盡
此生行欲散風漚

原註唐希鶴畫鵲
易元吉畫猿廉宣

仲老木王仲信水石
皆卷中所挂小軸

設色妍麗似晚唐人佳句

春日小園雜賦

市塵不到放翁家
繞麥穿桑野徑斜
夜雨長深三尺水
曉寒留得一分花
悶從鄰舍分春瓮
閒就僧窗試露芽

自近年光應更好日驅秧馬聽縑車

夜雨一聯鬆秀可愛

沈園

城上斜陽畫角哀沈園非復舊池臺傷心橋下春波綠
曾是驚鴻照影來

張完臣曰寫得幽豔動人

夢斷香消四十年沈園柳老不吹綿此身行作稽山土
猶弔遺踪一泫然

張完臣曰又深一步其痛愈深

紹興郡刻本題下註此放翁憶其前妻作也妻以失
歡於姑被遣後於沈園見之未幾下世翁再遊此地
追感賦詩淒苦不忍多讀

讀晉書

諸公日飲萬錢厨人乳蒸豚玉食無誰信秋風雒城裏
有人歸棹為蓴鱸

不著議論而指意躍然咏史上乘

春晴自雲門歸三山

乍行春野眼增明
漸減春衣體倍輕
人賣山茶先穀雨
鴉隨墻祭過清明
柳塘水滿雙鳬戲
稻隴泥深一犢行
晚到三橋泛舟去
掩關不復畏重城

夜聞姑惡

湖橋東西斜月明
高城漏鼓傳三更
釣船夜過掠沙際
蒲葦蕭蕭姑惡聲
湖橋南北煙雨昏
兩岸人家早閉門
不知姑惡何所恨
時時一聲能斷魂
天地大矣汝至微

滄波本自無危機秋菰有米亦可飽
哀哀如此將安歸
讀前輩詩文有感

我無前輩千鈞筆造物爭功謝不能
已分文章歸委靡
可憐意氣尚憑陵鸞旗廣殿晨排仗
鐵馬黃河夜踏冰
此事要須推大手蟬嘶分付與吳僧

巧構形似之言要非詣力所臻不能道
求親切乃爾
讀隱逸傳

終南處士入都門少室山人補諫垣
畢竟只供千載笑

石封三品鶴乘軒

不以議論傷格律比勘亦自允協

秋陰

淡日披朝霧輕雲結暮陰
菰蒲溪路暗松竹草堂深
妙墨雙鉤帖奇聲百衲琴
古人端未遠一笑會吾心

秋懷

皇天本無心萬物各有時
飛鴻何預人南翔每如期
仰看霜露墜俯歎草木衰
英英離下菊秀色獨滿枝
豈無

一樽酒相與斟酌之。耄老天所佚，行歌復何疑。

改朔甫再宿，月見西南隅。纖纖一銀鈎，挂空疑有無。我行青楓岸，遠水浮雙鳬。新寒入短衣，感此風霜初。頗欲呼小艇，東村行芋區。衣薄且言歸，煙火望吾廬。

閒淡有味

秋思

日落江城聞擣衣，長空杳杳雁南飛。桑枝空後醅初熟，豆莢成時兔正肥。徂歲背人常冉冉，老懷感物倍依依。

平生許國今何有且擬梁鴻賦五噫

冬晴與子坦子聿遊湖上

海山山下百餘家垣屋參差一帶斜我欲往尋疑路斷
試沿流水覓桃花

齋中弄筆偶書示子聿

左右琴樽靜不譁放翁新作老生涯焚香細讀斜川集
候火親烹顧渚茶書為半酣差近古詩雖苦思未名家
一窗殘日呼愁起裊裊江城咽暮笳

少陵云語不驚人死不休放翁云詩雖苦思未名家文
人之豪故自各有著力處今人未涉其境而漫以雕琢
直率置之可乎

祖應世曰放翁七律無一字效顰四唐而獨開蹊徑
別有一天何嘗寄人籬下

陳訐曰昔蘇長公教人作詩曰字字覓奇險節節累
枝葉又曰法度法前軌後山亦云要當攻石堅勿作
搏沙散放翁詩至萬首疑其無復持擇而改詩鍊句

每形篇什數公之於詩亦列子之御風而行靈均之
桂舟玉車也而其言顧如此

夢中作遊山絕句

霜風吹帽江村路小蹇迢迢委轡行忽到雲山幽絕處
穿林啼鳥不知名

北望感懷

榮河溫洛帝王州七十年來禾黍秋大事竟為朋黨誤
遺民空歎歲時道乾坤恨入新豐酒霜露寒侵季子裘

金少正人卷二
卷四十六
食粟本同天下賁孤臣敢獨廢深憂

有名論非尋常所及

人日東園

歲首未入春風氣已稍和我睡意慵起如此鳴禽何駕
言之東園落梅亦已多江南無堅冰綠池生微波挹彼
蒲萄醅酌我鸚鵡螺雖無絲與竹倚樹自高歌矯首東
南望稽山鬱嵯峨兒曹幸力穡老子得婆娑

枕上作

山雨蕭蕭過沙泉咽咽流夢中無遠道醉裏失孤愁貧
賁相如騎寒思季子裘兒童報新霽裹飯出閒遊
夢中無遠道五字亦未經人道游又有句云夢移鄉國
近則更奇矣

長干行

袞腰綠如草衫色石榴花十二學彈箏十三學琵琶寧
嫁與商人夫婦各天涯朝朝問水神夜夜夢三巴聘金
雖如山不願入侯家郭袖庭花下東風吹鬢斜

小橋

漠漠輕陰隱隱雷
石榴半落點莓苔
小橋西北闌干角
獨岸綸巾待雨來

觀畫山水

古北安西志未酬
人間隨處送悠悠
騎驢白帝城邊雨
挂席黃陵廟外秋
大網截江魚可膾
高樓臨路酒如油
老來無復當年快
聊對丹青作卧遊

示友

道向虛中得文從實處工
凌空一鶚上赴海百川東
氣骨真當勉規模不必同
人生易衰老君等勿匆匆

十月

十月霜侵李子裘
吾詩又送一年秋
風回斷續聞樵唱
木落參差見寺樓
久已浮雲看富貴
固應華屋等山丘
江邊海際多幽致
擬跨青驄處處遊

集中有木落寺樓高之句
與此領聯各有佳致

梅花

春信今年早江頭昨夜寒已教清徹骨更向月中看

對酒戲詠

淺傾西國蒲萄酒小嚼南州豆蔻花更拂烏絲寫新句
此翁可惜老天涯

盧世淮曰雋麗不可名狀

先少師宣和初有贈晁公以道詩云奴愛才如蕭
穎士婢知詩似鄭康成晁公大愛賞今逸全篇偶
讀晁公文集泣而足之

士不逢時勇退耕閉門自號景迂生遠聞佳士輒心許
老見異書猶眼明奴愛才如蕭穎士婢知詩似鄭康成
早孤遇事偏多感欲續殘章涕已傾

追感往事

諸公可歎善謀身誤國當時豈一秦不望夷吾出江左
新亭對泣亦無人

千年而後如聞嘆息之聲善謀身一言尤中庸臣病根
潘問奇曰此詩雖欠含蓄然亦可知南渡後雖周伯

仁亦難得

文集跋呂侍講歲時雜記年運而往士大夫安於江
左求新亭對泣者正未易得撫卷累歎

御選唐宋詩醇卷四十六

欽定四庫全書

御選唐宋詩醇卷四十七

山陰陸游詩六

目錄

春遊

三月二十日兒輩出謁孤坐北窗

西村

湖塘晚眺

秋夜

漁父

梅市

郭西

柳橋晚眺

秋社

村舍

秋日雜詠

小立

秋晚湖上

雨後至近村

題嚴州王秀才山水枕屏

追憶征西幙中舊事

解嘲

讀史

遣興

送于龍赴吉州掾

正月五日出遊

初春雜興

杜叔高秀才雨雪中相過留一宿而別誦此詩送之

村居書喜

別嚴和之

舟中作

夏初湖村雜題

書直舍壁

謝韓實之直閣送燈

直舍獨坐思成都

出東城並江而歸

立春後十二日命駕至郊外戲書觸目

河橋晚歸

後寓嘆

與兒輩泛舟遊西湖一日間晴陰屢易

秋思

小徑登東山繚行自西北至溪上

感憤

野興

幽居春晚

閑雨

書事

明日復理夢中意作

舍南野步

出遊

山行

感昔

風雲晝晦夜遂大雪

夢華山

道室

倚樓

石帆夏日

乙丑夏秋之交小舟早夜往來湖中戲成絕句

懷舊

春雨

梨花

雜感

出遊歸鞍上口占

初夏閒居

地僻

未陽令曾君寄禾譜農器譜二書求詩

夏末野興

訪山家

寄隱士

春前六日作

贛士曾興宗字光祖以其居箕簞谷圖來求詩

夏日雜題

西村晚歸

雨晴

秋夜

累日濃雲作雪不成遂有春意

野望

春晴

恩封渭南伯唐詩人趙嘏為渭南尉當時謂之趙

渭南後來將以予為陸渭南乎戲作長句

山行

初夏書感

對酒作

頃歲從戎南鄭屢往來興鳳間暇日追懷舊遊有
賦

異夢

夜坐小飲

雜感十首之二

仲秋書事

秋日徙倚門外久之

聞新雁有感

小園獨酌

古意

湖上尋梅

湖山

雪晴欲出而路渇未通戲作

春日雜興

蘭亭道上

初夏雜興

山行過僧菴不入

夏日六言

夏日泛溪至南庄復回湖桑歸

郊行

文章

思蜀

江村

示兒

欽定四庫全書

御選唐宋詩醇卷四十七

山陰陸游詩六

春遊

春風堤上草萋萋
草軟沙平護馬蹄
似蓋微雲纔障日
如絲細雨不成泥
千秋觀裏逢新燕
九里山前聽午雞
追憶舊遊愁滿眼
綵船曾繫畫橋西

三月二十日兒輩出謁孤坐北窗

園林春已空
陂巷雨新足
泥深黃犢健
桑老紫椹熟
豐年逋負少
村舍壓酒肉
微風吹醉醒
起和飯牛曲
樸直有味

西村

亂山深處小桃源
往歲求漿憶叩門
高柳簇橋初轉馬
數家臨水自成村
茂林風送幽禽語
壞壁苔侵醉墨痕
一首清詩記今夕
細雲新月耿黃昏

湖塘晚眺

綠樹暗村墟青山繞草廬奉祠神禹舊馳道暴秦餘浦
色沉煙網蛙聲入雨鉏清秋又如許幽憤若為攄
病起閒無事時來古渡頭煙中賣魚市月下采蓮舟帆
鼓娥江晚菱歌姥廟秋長吟無傑句聊以散吾愁
氣體高妙在盛中之間

秋夜

老病睡眠少如斯秋夜何長庚未配月織女已斜河莎
徑蟲吟苦柴門葉落多誰知窮甯戚不作飯牛歌

漁父

千錢買一舟百錢買兩槳
朝看潮水落暮看潮水長
持魚換鹽酪縣郭時下上
亦或得濁醪不復計瓦盞
浩歌忘遠近醉夢墮莽蒼
元真不可逢悠然寄遐想

梅市

梅市柯山小繫船開篷驚起醉中眠
橋橫風柳荒寒外月墮煙鐘縹渺邊
客思况經孤驛路詩情又入早秋天
如今老病知何恨判斷江山六十年

清和宛轉可謂物理俱美情致兼深矣

盧世淮曰是雲林寫景

郭西

鵲下川原黑船行浦澈空橋燈搖水影樓角散天風野
眺飛埃外漁歌冷翠中不須朔病翼要是脫樊籠

柳橋晚眺

小浦聞魚躍橫林待鶴歸閒雲不成雨故傍碧山飛
有手揮目送之趣

秋社

雨餘殘日照庭槐
社鼓寥寥賽廟回
又見神盤分肉至
不堪沙雁帶寒來
書因忌作閒終日
酒為治聾醉一杯
記取鏡湖無限景
蘋花零落蓼花開

村舍

生理嗟彌薄
吾居久未完
蝶飛窗紙碎
龜坼壁泥乾
小
雨牛欄濕
微霜碓舍寒
晚禾蟲獨少
鄰里共相寬

原註
今年

晚禾苦蟲蛀
予鄉獨免

潘問奇曰生初不肯蹈襲一字

秋日雜詠

菰蒲風起暮蕭蕭
煙斂林疎見斷橋
白蟹鯿魚初上市
輕舟無數去乘潮

竹枝遺調

小立

紅樹園廬晚碧花
籬落秋荒陂船護鴨
斷岸笛呼牛酒
賤村村醉山寒寺
寺幽聊須岸烏幘
小立埭西頭

秋晚湖上

已過西成賽廟期
家家下麥不容遲
夕陽徧野人歸後
秋水生灘鷺集時
靈藥不治懷抱惡
好詩空益鬢毛衰
從來未識蘓司業
愁絕西風滿酒旗

結句善於運化有縹緲之韻

雨後至近村

夜雨曉方止
朝雲猶作陰
山餘一寸碧
溪長半篙深
卧泛白鷗渚
行穿黃葉林
老農能共語
真率會人心

題嚴州王秀才山水枕屏

我行天下路幾何三巴小益山最多翠崖青嶂高嵯峨
紅棧如帶縈巖阿下有駭浪千盤渦一跌性命委蛟鼉
日馳三百一烏騾雪壓披氊泥滿鞞驛亭沃酒醉臉酡
長笛腰鼓雜巴歌大散關上方橫戈豈料世變如翻波
東歸輕舟下江沱回首歲月悲蹉跎壯君落筆寫岷嶓
意匠自到非身過偉哉千仞天相摩谷裏人家藏綠蘿
使我恍然越關河熟視粉墨頻摩挲

鏗然徹耳煥然奪目意匠自到非身過尤有妙理

追憶征西幙中舊事

小獵南山雪未消繡旗斜卷玉驄驕不如意事常千萬
空想先鋒宿渭橋

昨夜王師戍隴回遺民日夜望行臺不論夾道壺漿滿
洛筍河魴次第來

原註在南鄭時聞中將史有獻此二物者

解嘲

一壑棲遲久多生習氣消行藏無媿怍夢覺兩逍遙倩

鶴傳春信疏泉洗藥苗晚來幽興極桑月過西橋

讀史

民間斗米兩三錢萬里耕桑罷戍邊常使屏風寫無逸
應無烽火照甘泉

保泰持盈之指借明皇發之不落言詮自近風雅

遣興

家住城南剡曲傍門前山色蘸湖光三朝執戟悲年往
二頃扶犁樂歲穰名姓已隨身共隱文辭終與道相妨

子孫勉守東臯業小甌吳粳底樣香

方回曰五六議論最妙

送子龍赴吉州掾

我老汝遠行知汝非得已
駕言當送汝揮涕不能止
人誰樂離別坐貧至於此
汝行犯胥濤次第過彭蠡
波橫吞舟魚林嘯獨脚鬼
野飯何店炊孤權何岸檣
判司比唐時猶幸免笞箠
庭參亦何辱負職乃可恥
汝為吉州吏但飲吉州水
一錢亦分明誰能肆讒毀
聚俸嫁阿惜

擇士教元禮我食可自營勿用念甘旨衣穿聽露肘履
破從見指出門雖被嘲歸舍却睡美益公名位重凜若
喬嶽峙汝以通家故或許望燕几得見已足榮切勿有
所啟又若楊誠齋清介世莫比一聞俗人言三日歸洗
耳汝但問起居餘事勿挂齒希周有世好敬叔乃鄉里
豈惟能文辭實亦堅操履相從勉講學事業在積累仁
義本何常蹈之則君子汝去三年歸我儻未即死江中
有鯉魚頻寄書一紙

以韻語作訓詞真情極切自然成文樸茂渾堅大家本
領

正月五日出遊

久作閒人不慣愁
新春天氣更清柔
未為遶海千年別
且繼斜川五日遊
細柳拂頭穿野徑
落梅黏袖上漁舟
此身定去神仙近
倚遍江南賣酒樓

初春雜興

水長鷗初泛
山寒茗未芽
深林聞社鼓
落日照漁家
渡

遠呼船久橋傾取路斜客愁慵遠眺不是怯風沙

方回曰八句皆佳而二四尤古遠

老病倦遊步偶尋溪友期殘冰擁魚笥新暖入桑枝山
崦巨然畫煙村摩詰詩何人為收拾媿我不能奇

杜叔高秀才雨雪中相過留一宿而別誦此詩送
之

久客方知行路難關山無際水漫漫風吹欲倒孤城遠
雪落如從野寺寒暮挈衣囊投土室晨沽村酒挂驢鞍

文章一字無人識
胸次徒勞萬卷蟠

用筵字新異可喜

村居書喜

紅橋梅市曉山橫
白塔樊江春水生
花氣襲人知驟暖
鵲聲穿樹喜新晴
坊場酒賤貧猶醉
原野泥深老亦耕
最喜先期官賦足
經年無吏叩柴荆

別嚴和之

器之魂逝已難招
尚有和之慰寂寥
今夜月明空歎息

想君孤棹泊溪橋

舟中作

晤語無人與遣愁
出門聊復弄輕舟
山穿煙雨參差出
水赴陂塘散漫流
隔葉雌雄鳴谷鳥
傍林子母過吳牛
數家清絕如圖畫
炊黍何妨得小留

盧世淮曰寫景閒雅

夏初湖村雜題

嫩日輕風夏未深
曲廊倚杖得閒吟
地偏草茂無人迹

一對焚鷄下綠陰

書直舍壁

道山西下路杳杳歷重廊地寂聞傳漏簾疎有斷香渠
清水馬健屋老瓦松長欲出重欹枕無何覓故鄉

方回曰水馬瓦松詩人罕用此聯可喜

謝韓實之直閣送燈

玉作華星綴絳繩樓臺交映暮天澄東都父老今誰在
腸斷當時諫浙燈

盧世淮曰詩自謝燈意別有在

張完臣曰無限感慨觸物而流

蘇軾諫浙燈劄子伏見中使傳宣下府市司買浙燈
四千餘盞有司其實直以聞陛下又令減價收買見
已盡數拘收禁止私買以須上令臣始聞之驚愕不
信咨嗟累日竊為陛下惜此舉動也

直舍獨坐思成都

錦城花絮送吳船屈指東歸又幾年羣玉峰頭花老矣

百花潭上夢依然青衫尚記稱狂客白髮寧知作老僊
所恨酒腸非復昔閒遊空負杖頭錢

出城東並江而歸

上車容假寐出郭當閒遊遠笛臨風起高帆到岸收人
歸花市路客醉酒家樓徑就東園卧孤燈欲話愁

立春後十二日命駕至郊外戲書觸目

宮雲縹緲漏聲遲夢裏華胥却自疑春淺風光先盡
時平節物共熙熙畫簾不捲聞人語玉勒徐行避酒旗

閱盡輩流身獨健
恍如隨計入都時

河橋晚歸

曲巷連新市
層樓近小橋
青帘猶滴雨
綠浦恰通潮
簾影晴方見
笙聲冷未調
斜陽覓歸路
偏愛玉驄騎
筆墨間有香氣
似初唐人佳製

後寓嘆

貂蟬未必出兜鍪
要是蒼鷹憶下韉
彭澤徑歸端為酒
輕舟已老豈須侯
千年精衛心平海
三日於菟氣食牛

會與高人期物外摩挲銅狄灞城秋

吳喬曰此當有後進妄生長短如韓君在夷門也

與兒輩泛舟遊西湖一日間陰晴屢易

逢著園林即款扉酌泉鬻筍欲忘歸楊花正與人爭路
鳩語還催雨點衣古寺題名那復在後生識面自應稀
傷心六十餘年事雙塔依然在翠微

寫景最工著語一何娟妙

秋思

烏桕微丹菊漸開
天高風送雁聲哀
詩情也似并刀快
剪得秋光入卷來

小徑登東山繚行自西北至溪上

原註是夕
子聿置酒

行穿翠確度谿砦
小立風中客袖斜
衰草雙雙點飛蝶
長空一一送棲鴉
荻洲薄暮收魚網
茆舍初寒響緯車
誰道老人多感慨
未妨尊酒樂年華

感憤

形勝峭潼在英豪
趙魏多精兵連六
郡要地控三河慷

慨鴻門會悲傷易水歌幾人懷此志送老一漁蓑

野興

掃盡紅塵閉是非舍傍好在舊苔磯
壺中春色松肪酒江上秋風槲葉衣
一片共知雲偶出千年誰識鶴重歸
勿言野外無供給雪後連山藥草肥

五六情事恰合

幽居春晚

老廢讎書病廢詩晝閒惟與睡相宜
未尋內史流觴地

又近龐公上塚時
花發遊蜂喧院落
筍長馴鹿入藩籬
石帆山下春如許
野老來招不用辭

盧世淮曰三四從上轉下機軸一貫

閔雨

歲秋固多雨
每恨不及時
黃塵蔽赤日
苗槁已不遲
踏車聲如雷
力盡真何為
天豈不念民
雲族風散之
窮民守稼泣
便恐化棘茨
妻子不望活
所懼尊老飢
我願上天仁
顧哀民語悲
鞭龍起風霆
尚繼豐年詩

詞旨深厚

書事

北征談笑取關河
盟府何人策戰多
掃盡煙塵歸鐵馬
剪空荆棘出銅駝
史臣歷紀平戎策
壯士遙傳入塞歌
自笑書生無寸效
十年枉是枕琱戈

明日復理夢中意作

白盡髭鬚兩映紅
頽然自以放名翁
客從謝事歸時散
詩到無人愛處工
高挂蒲帆上黃鶴
獨吹銅笛過垂虹

閒人浪迹由來事那計猿驚蕙帳空

劉克莊曰近歲詩人雜博者堆垛仗空踈者窘才料
出奇者費搜索縛律者少變化惟放翁記問足以貫
通力量足以驅使才思足以發越氣魄足以陵暴南
渡而下故當為一大宗末年詩云客從謝事歸時散
詩到無人愛處工又云外物不移方是學俗人猶愛
未為詩則皮毛落盡矣

舍南野步

枯蔓絡荆籬幽花映荻扉馴麇驚不起歸鶴倦猶飛野
色連收網邊愁入搗衣壯圖空自笑事事與心違
寫入邊愁一句便覺情景混融通體靈妙

出遊

山有籃輿步有舟放翁身健得閒遊羊牛點點日將夕
蒲柳蕭蕭天正秋細雨僧歸雲外寺疎燈人語酒家樓
歸途更愛湖橋月獨倚闌干為小留

山行

山光秀可餐溪水清可啜白雲映空碧突起若積雪我
行溪山間靈府為澄澈峻嶒崖角立蟠屈路九折黃楊
與冬青鬱鬱自成列其根貫石罅橫逆相糾結上捫鵬
鷖巢下歷豺虎穴流泉不可見鏘然響環玦出山日已
暮林火遠明滅小憇得樵家題詩記幽絕

不失子美家法

感昔

白帝城邊鶯亂啼憶騎瘦馬踏春泥老來感舊多悽愴

孤夢時時到瀼西

風雲晝晦夜遂大雪

大風從北來洶洶十萬軍草木盡偃仆道路暝不分山
澤氣上騰天受之為雲山雲如馬牛水雲如魚鼃朝暘
翳白日暮重疊厚坤高城岌欲動我屋何足掀兒怖牀
下伏婢恐堅閉門老翁兩耳聵無地著戚欣夜艾不知
雪但覺手足皸布衾冷似鐵燒糠作微溫豈不思一飲
流塵暗空樽已矣可奈何凍死向孤村

奇崛

夢華山

古松偃蹇谷谿訝太華峰前野老家
久客未歸丹竈冷
碧桃八十一番花

道室

簷遇風山第六爻
脩然盡謝俗間交
謀生舊買雲三頃
託宿新分鶴半巢
露下丹芽生藥壠
月明金粉落松梢
眉間喜動君知否
借得丹經手自抄

鏗然清響殊有仙靈之氣

倚樓

曲曲闌干縹緲間
哦詩本欲破除閒
無端又起天涯感
消墨生綃數點山

石帆夏日

短棹飄然信所之
茶園漁市到無時
風從蘋末蕭蕭起
月過花陰故故遲
蓴菜煮羹吳舊俗
竹枝度曲楚遺辭
頗聞項里楊梅熟
隣曲相招莫後期

乙丑夏秋之交小舟早夜往來湖中戲成絕句

橫林渺渺夜生煙
野水茫茫遠拍天
菱唱一聲鶩夢斷
始知身在釣魚船

有聲有情迥然高唱

娥江道上月三更
垣屋參差閉月明
倚柁賦詩無傑思
斷腸分付棹歌聲

懷舊

身是人間一斷蓬
半生南北任秋風
琴書昔作天涯客

蓑笠今成澤畔翁夢破江亭山驛外詩成燈影雨聲中
不須強覓前人比道似香山實不同

王世貞論詩以樂天放翁為廣大教主為其情事景物
之悉備也此老情事頗近于美其意中亦欲與浣花老
叟相視而笑故其自道如此

春雨

春陰易成雨客病不驚寒又與梅花別無因一倚欄

梨花

開向春殘不恨遲綠楊窳地最相宜征西幕府煎茶地

一幅邊鸞畫折枝

原註宣司靜鎮堂
屏上有邊鸞梨花

盧世淮曰梨花詩至此又是一種結構

雜感

春晚晴還雨村深醉復醒溪添半篙綠山可一窗青樂
品隨長鑱花名記小屏閒身幸無事吟嘯送餘齡
可字雖出唐人自成佳句

出遊歸鞍上口占

渺渺煙波飛檣去迢迢桑野策驢還寄懷楚水吳山外
得意唐詩晉帖間每惜好春如我老誰能長日伴人間
世間自是無兼得勛業元非造物慳

初夏閒居

川雲漠漠雨冥冥濁酒間傾不滿瓶蠶簇尚寒憂繭薄
稻陂初滿喜秧青王師護塞方屯甲親詔憂民已放丁
病起自憐猶健在不須求應少微星

琢句工穩而氣格不傷

地僻

地僻臨湍瀨門幽長綠苔客書疑誤達僧刺媿虛來清
露頻花坼斜陽燕子回自憐猶有恨佳日對空罍
何其風秀

耒陽令曾君寄耒譜農器譜二書求詩

歐陽公譜西都花蔡公亦記北苑茶農功最大置不錄
如棄六藝崇百家曾侯奮筆補多稼儋州讀罷深咨嗟
一篇秧馬傳海內農器名數方萌芽令君繼之筆何健

古今一一辨等差我今八十歸抱耒兩編入手喜莫涯
神農之學未可廢坐使耒俗慙浮華

文獻通考陳氏曰禾譜五卷宣德郎溫陵曾安止移
忠撰東坡所謂賦秧馬歌也謂禾譜文既溫雅事亦
詳實惜其不譜農器故以此歌附之農器譜三卷續
二卷耒陽令曾之謹撰安止之姪孫也追述東坡作
歌之意為此編周益公為之序陸務觀亦作詩題其
後

夏末野興

半世天涯倦遠遊，還鄉不減旅人愁。
數聲相應鳩呼雨，一片初飛葉報秋。
山塢風煙僧院路，河梁燈火酒家樓。
絕知雪鬢宜簪笠，分付貂蟬與黑頭。

訪山家

捨舟步上若耶溪，壽櫟修藤路欲迷。
僧院倚山馴栗鼠，野塘灘水下茭雞。
草侵古路迢迢遠，雲傍行人故故低。
薄暮但尋遺堯去，山家正在鶴巢西。

寄隱士

乳竇寒猶滴巖扉夜不扃
奇書窺鳥跡靈藥得人形
浩浩天風積冥冥海氣清
儻逢王內史更為乞黃庭
較少陵押形字更新

春前六日作

夜枕夢回春雨聲
曉窗日出春鳥鳴
典衣沽酒莫辭醉
自有梅花為解醒

顓士曾興宗字光祖以其居貧篋當谷圖來求詩

高人心虛萬物宗家世常以仕易農買山本愛坡上竹
手種已偃巖前松瀑泉三伏凜冰雪谷聲十里酣笙鏞
了知自是一丘壑不與金精為附庸

原註地與金精
山青牛峽為鄰

磊砢多奇宮商悉諧第六句蓋取諸坡仙者

夏日雜題

午夢初回理舊琴竹爐重炷海南沉茅簷三日蕭蕭雨
又展芭蕉數尺陰

西村晚歸

小屋花垂盡平隄草次迷日長鶯語久風定絮飛低于
響聞碁院舟橫傍釣溪歸途不知處依約埭東西

古今得意句難得一聯悉稱暗牖懸珠網不如空梁落
燕泥傍水見寒花不如出關逢落葉也田藝衡詩談云
爾如此詩風定絮飛低五字亦豈易得

雨晴

早曠常思雨沉陰却喜晴放船蓮蕩遠岸幘竹風清淮
浦戎初遁興州盜甫平為邦要持重恐復議銷兵

秋夜

落葉鳴遙夜
啼螿送暮秋
不知何許笛
故作此時愁
青海三年戍
黃旗萬里侯
如石帆下煙
雨釣滄洲
風格道上故
應突過錢郎

累日濃雲作雪不成遂有春意

釀雪經旬竟不成
一霜却作十分晴
雲歸岫穴千峰立
暎入郊原萬耦耕
葛葉離離豐歲候
梅花眷眷故人情
道傍孤店新醅熟
已有幽禽一兩聲

野望

偶携一小豎徙倚望南山
船笛為誰怨溪雲如我閒
洲長歸雁下天迴暮鴉還
安得一竿去終年煙水間

春晴

常年春日少春晴拂面今朝暝
吹輕水閣家家橫小舫
園亭處處聽新鶯桃花不管詩人老
菖葉空催野叟耕
自笑此生餘幾許銅駝荊棘尚關情

恩封渭南伯唐詩人趙嘏為渭南尉當時謂之趙

渭南後來將以予為陸渭南乎戲作長句

老向人間久倦遊君恩乞與渭川秋
虛名定作陳驚座
好句真慙趙倚樓
棧豆十年霑病馬
煙波萬里著浮鷗
就封他日輕裘去
應過三峰處處留

盧世淮曰欲遜欲任兩意俱有

山行

山鳥啼孤戍煙蕪入廢亭
隄成陂水白雨細稻秧青草
市少行旅鼓祠多乞靈
最憐投宿處微火暮晶熒

初夏書感

春與人俱老花隨夢已空
遊蜂黏落蕊輕燕接飛蟲
桑悴知蠶起牲肥賽麥豐
為農當自力相戒勿怱怱
諸詩皆莫年之作老氣縱橫而格律彌細

對酒作

飲酒豪如卷白波
遣愁難似塞黃河
多聞自解為身累
後死空令見事多
未試神仙餐玉法
且賡壯士入關歌
此心不道無人識
雪鬢蕭蕭奈老何

頃歲從戎南鄭屢往來興鳳間暇日追懷舊遊有
賦

昔戍蠶叢北頻行鳳集南烽傳戎壘密驛遠客程貪春
盡花猶坼雲低雨半含種畬多菽粟藝木雜松栟婦汲
惟陶器民居半草菴風煙迷棧閣雷霆起湫潭城郭秦
風近村墟蜀語參快心逢曠野刮目望浮嵐考古時興
感無詩日每慚嘉陵最堪憶迎馬柳毵毵

方回曰放翁詩出於曾茶山而不專用西江格有晚

唐有中唐亦有盛唐此篇雖陳杜沈宋亦不過如此
流麗綿密

異夢

山中有異夢重鎧奮雕戈敷水西通渭潼關北控河淒
涼鳴趙瑟慷慨和燕歌此事終當在無如老死何

夜坐小飲

零落槐花已滿溝江湖又見一番秋水輪有轍凌空上
銀漢無聲接地流丹荔甘寒勞遠致玉醅醇冽喜新筵

移床坐對西南電好雨心知不待求

雜感十首之二

呂釣渭水濱說築傅巖野雖曰古盛時得士蓋亦寡天
將啟治亂人才有用舍向非萬牛力孰與成大厦
洙泗日已遠儒術日已喪學者稱孔墨為國雜伯王書
生幸有聞力薄不能倡默默世俗間汝職無乃曠
詞旨宏深雖筆意微斂却有大篇氣象

仲秋書事

斷雲歸岫雨初收
茅舍蕭條古渡頭
短褐老人垂九十
松枯石瘦不禁秋

秋日徙倚門外久之

舍前煙水似瀟湘
白首歸來愛故鄉
五畝山園鬱桑柘
數椽茅屋映菰蔣
翻翻小繖船歸郭
渺渺長歌月滿塘
却掩柴荆了無事
篆盤重點已殘香

聞新雁有感

新雁南來片影孤
冷雲深處宿菰蘆
不知湘水巴陵路

曾記漁陽上谷無

如此寓感亦匪夷所思

小園獨酌

橫林搖落弄微丹
深院蕭條作小寒
秋氣已高殊可喜
老懷多感自無歡
鹿初離母斑猶淺
橘乍經霜味尚酸
小酌一卮幽興足
豈須落佩與頽冠

古意

千金募戰士
萬里築長城
何時青塚月
却照漢家營

夜泊武昌城江流千丈清寧為雁奴死不作鶴媒生

湖上尋梅

鏡湖渺渺煙波白不與人間通地脉騎龍古仙絕火食
慣住空山齧冰雪東皇高之置度外正似人中巢許輩
萬木僵死我獨存本來長生非返魂

小雪湖上尋梅時短帽亂揀皆繁枝路人看者竊相語
此老胸中常有詩歸來青燈耿窗扉心鏡忽入造化機
墨池水淺筆鋒燥笑拂吳箋作飛草

仗氣愛奇遂成異境方回取梅花詩十五篇殊不逮此

湖山

坡陀度小嶺軒豁見平湖但醉梅花下民間酒可沽

原註

花徑
小嶺

故堞無遺跡蕭然數十家茶煙映山起酒旆傍隄斜

原註

古城

雪晴欲出而路澗未通戲作

欲覓溪頭路春泥不可行歸來小窗下袖手看新晴

春日雜興

行人陌上思悠悠
十里斜陽古渡頭
一片落花無覓處
只教芳草管閒愁

蘭亭道上

湖上青山古會稽
斷雲漠漠雨淒淒
籃輿晚過偏門市
滿路春泥聞竹雞

箭箠弓弦小獵回
壯心自笑未低摧
前身家近盤閭路
曾看吳王射雉來

蘊藉不失唐人風調

初夏雜興

隱趣與誰論
深居湖上村
避蘭寧改路
惜筍不開庭
草饒生意
溪沙記漲痕
愁來時淺酌
隨事有雞豚

山行過僧菴不入

垣屋參差竹塢深
舊題名處懶重尋
茶爐煙起知高興
碁子聲疎識苦心
淡日暉暉孤市散
殘雲漠漠半川陰
長吟未斷清愁起
已見橫林宿暮禽

方回曰詩極高勝尤有工夫針線如老杜所謂裁縫
減盡針線迹也殘雲一聯及末句結乃結煞山行一
段餘意前輩詩例如此須合別有擺脫老杜縛雞行
山谷水仙花皆然

夏日六言

醉面貪承夕露釣竿喜近秋風借問孤舟何處深入笑
渠浦中

溪漲清風拂面月落繁星滿天數隻船橫浦口一聲笛

起山前

夏夜泛溪至南莊復回湖桑歸

不求奇骨可封侯但喜枯腸不貯愁
數點殘燈沽酒市一聲柔櫓採菱舟
元知澤國偏宜夜已就天公採借秋
歸過三更風露重紗巾剝覺髮飈飈

郊行

淒風吹雨過江城緩策羸驂並水行
古路初驚秋葉墮荒郊已放候蟲鳴
壯心耿耿人誰識往事悠悠恨未平

斜日半竿羌笛怨西陵寂寞又潮聲

結有神韻

文章

文章本天成妙手偶得之粹然無疵瑕豈復須人為君
看古彝器巧拙兩無施漢最近先秦固已殊淳漓胡部
何為者豪竹雜哀絲后夔不復作千載誰與期

深識妙解非淺人所能與游常言詩欲工而工亦非詩
之極鍛鍊之久乃失本指斲削之甚反傷元氣觀其所

言其自命可知矣李東陽謂宋人之詩但一字一句對
偶雕琢之工而天真興致未可與道者不知能識此意
否

楊大鶴曰放翁詩至萬首然翁又言文章本天成妙
手偶得之自然無疵瑕豈復須人為自言間為長謠
短章楚調唐律酬答風月煙雨之態度非為娛耳目
遣暇日而已此豈粘頭綴尾朝鐫夕琢必待月久歲
深以多作為能者哉

思蜀

西遊陳迹浩無窮回首真同一夢中
柳拂驛牆思鳳集鼓宣市里憶蠶叢
故人丘壘秋蕪碧舊隱園林夕照紅
自閑未能忘感慨浩歌彈劍送飛鴻

江村

江村連夜有飛霜柿正丹時橘半黃
轉枕却尋驚斷夢撥爐偶見爇殘香
醫無絕藝空三易死與浮生已兩忘
拈得一書還嬾看卧聽孫子誦琅琅

陳訐曰放翁一生精力盡於七律故全集所載最多
最佳古詩少有鬆處然至其精彩發露自斑駁可愛


示兒

死去元知萬事空但悲不見九州同王師北定中原日
家祭無忘告乃翁

祖應世曰放翁易箴嘉定中國弱已極而尚作此想
其齋志可悲矣

褚人穫曰示兒一絕有三呼渡河之意

周之麟曰觀於家祭無忘之語千秋而下亦為長慟
此其用心與子美何以異哉



御選唐宋詩醇卷四十七